



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

40. Kalenderwoche – ab 04. Oktober 2009

Dor alde Dambfor dambfd widdor

Ham Sie das ooch schon gelähsn? De Benkor in allor Weld sinn widdor iborn Bersch un machn so weidor, wie vor dor großn Finanzgriese! Als wie wenn nischd gewähsn sein däde! De Bonusse fließn, de Börse buhmd! Dor Dachs is schon fasd widdor so gefrähsisch wie vorhähr.

Na, de Vorlusde ham ja de Schdeuorzahlor von Woschingdon bis Bährlin ibornomm. Ja, mir geheern da ooch dazu! Ja, mir Gnalloochn! Isch ooch, isch Rindvieh!

De Schdaadsscheffs von de greeßdn Ländor dor Weld ham zwahr einische Male dähn Fingor erhohm un "dudududu" gemachd, un de Benkor solln ooch ma ganz kurz beschämnd nach und n off ihre Fußschbidzn geguggd ham... abor das is bloß e Gerischd! Gesähn hads keenor.

Meine Gudste sachd, solange mir alle so bleede sin, un das Schbiel midmachn, machn de Benkor das immor widdor! Jede Griese is e Adrenaliehnschdoss fiehr die! De Milljarden, die se gemachd hamm, sinn ja nisch weg. Irschendwähr von die had die. Un zusätzlisch hamse nu noch die Milljardn, die mir dazugegähm ham. Es is ehm bloß e bißl e Durschenandor gewähsn. De Lehmanns-Brassers sind villeischd werglisch bleide gegang, abor isch gloobe nisch, dass die jedzde darbn missn. Die brassn weidor, die Brassers! Garandierd!

Nee, de meisdn Bankn sinn rischdisch geredded wordn. Moddo: Gosde es was es wolle! Abor ehm - die sidzn nu nisch bibbornd un dankbar im Reddungsbood - nee! Die sidzn schon widdor off ihrn aldn großn Dambfor un schdeuorn dähn aldn Gurs - widdor off dähn Eisbersch zu! Un wenss widdor grachn dud, un dähr Dambfor unnorzugehn drohd, da wern schon widdor genuch Reddor da sein, die dähn Dambfor irschendwie ibor Wassor haldn. Da sinn die sisch ganz gewiss! Naja, das

kenn se ja ooch sein - se ham ja genuch Leide in dor Regierung sidzn, die offbassn dun, dass nisch aus vorsähn absaufn - mid ihm aldn Dambfor!

Die machen widdor Gewinne in Milljardnheehe! Die zoggn widdor rum un ham kee Risigoh daderbei. Die kenn bloß absahn!

De eenzsche Meeschlichkeed die daderzu zu bring, dass die offheern mid Absahn, das is, wemmor die werglisch allesamd unnorgehn lässt - wie de Didanig! - sachd meine Gudste. Un dann muss mor abor noch außordähm offbassn, dass keenor e Reddungsbood aussedzn dud. Die missn ersaufn, sonsd machn die weidor!

Un dähr Dambfor muss vorschrodded wern! Dass keene annorn droffschdeischn dun. Abor währ soll dass denne machn? Dähn scheen Dambfor vorschroddn? Dähr, wo so viel Geld abwerfn dud! Also fiehr die, die irschendwie mid droffsidzn dun! Odor die, die wie de Haie um dähn Dambfor ringsrum schwimm dun un ehm immor ma een feddn Habbn abgrischn.

Daderzu dun mir nisch geheern. Mir sinn die gleen Fische, die in dor Nahrungsedde eene wischdische Fungdsjohn ham - mir sin die, die gefressn.wern.

Eduard Sachsenmeyer